



AZ.
ola III
L.
NA

BIBL. NAZ.
Vitt Emanuele III

SUPPL.
PALATINA

C

324

NAPOLI

937

Suppl. Palat. C 324

626.910


EPISTOLA PASTORALIS

AD

CLERUM ET POPULUM

UTRIUSQUE DIOECESIS

BRUNDUSINAE ET OSTUNENSIS



ROMAE

IN XENODOCHIO S. MARIAE ANGELORUM

MDCCCXLI



DIDACUS PLANETA
PATRIQIUS SAMBUGENSIS

EX DYNASTIS DIVAE CAECILIAE

DEI ET APOSTOLICAE SEDIS GRATIA

ARCHIEPISCOPUS BRUNDUSINUS

ET PÉRPETUUS ECCLESIAE OSTUNENSIS ADMINISTRATOR



*VENERABILIBUS FRATRIBUS ET DILECTISSIMIS FILIIS CLERO ET POPULO
SUAE DIOECESeos SALUTEM ET BENEDICTIONEM*

Vix supremus animarum Pastor Ecclesiae Brundusinae Archiepiscopum Nos instituit, et per manuum impositionem sacro oleo inuncti fuimus continuo nostris curis, et amoribus sponsam tradidit, eique nos indissolubili spiritualium vinculo nuptiarum coniunxit, copulavitque. Tunc et mira cor nostrum arsit cupiditate illam adenndi, alloquendi, in Christo amplexandi, bene illi omnia, et prospere adprecandi, luculentaque ardentis argumenta charitatis significandi, qua testem amoris nostri sanguinem pro ea tuenda, ubi oporteret, millies profundere parati sumus. Sic animo affecti, quod per Nos praesentes non licet, magna animi impatientia vel absentes per hanc pastoraletn epistolam properamus: quam quidem a vobis acceptam volumus, tanquam primum, et certissimum ingenui, ac vehementissimi nostri pignus, ac testimonium amoris, qui, ut Patrem Filiis, Pastorem gregi, Caput membris, Nos ita vobis consociat, et quasi coagmentat.

Primo igitur, dum vos universos carissime amplectimur, Deumque bonorum omnium largitorem imploramus, atque obtestamur, ut vos caelestibus quibusque donis augeat, cumuletque, contineri nequaquam possumus, quin effusam animi nostri laetitiam, plenumque gaudium (quod idem et vestrum esse cupimus) vobis ostendamus. Huius autem communis utrisque gaudii una tantum est causa; quod nempe non carnis, neque sanguinis, sed Dei voluntas unice vobis dedit Pastorem: atque haec sane ad grave onus alacri, promptoque animo subeundum Nos impulit. Profecto Nos non latebat, quam formidandum esset non hominum humeris, sed et ipsis Angelis Episcopatus onus: oportere autem Pastorem verbo, et exemplo praecire, ut oves non invitae sequantur; talemque se exhibere, qualem in Tito suo animarum pastorem Paulus informat, sanctum, prudentem, pudicum, doctrina praestantem, ceterisque instructum virtutibus, quae Apostolorum successorem plane referant. Nec ignorabamus, luctuosissimis hisce temporibus eo plus difficultatis, laboris, ac molestiae asferre Episcopo curam animarum, quo maior, et communior est morum corruptela. Quod magis exploratum nobis est experientia, quam in variis, maximisque negotiis multos per annos comparavimus ex quo in Magna Curia Archiepiscopali Monregalensi Fisci Patronum gessimus, ac nostra qualicumque opera uni ex clarissimis huiusce aevi Praesulibus ex propinquo praesto fuimus. Haec omnia noveramus minime fore suspicantes, ut id oneris nostris imponeretur humeris: imo satis conscii nostrae, si non quanta est, imbecillitatis, tenuitatisque meritorum neque Nos quidem pares arbitrabamur Sacerdotalibus muniis naviter, fideliterque obeundis; magnaque animi nostri trepidatione meditabamur, quam

districta de Sacerdotali dignitate, ad quam Dei benignitate evecti fuimus, ratio a Nobis Supremo Iudici esset red-
denda.

Ex his, quae memoravimus, Venerabiles Fratres, et Dilectissimi in Christo Filii, probe nostis, quo suspenso, sollicitoque animo fuerimus, ubi Nos nec id opinantes Clementissimus Rex Ferdinandus II. ad Archiepiscopatum Brundusii cum perpetua Ecclesiae Ostunensis administratione apud summum Pontificem designavit. Ad inexpectatae rei nuncium Nos aestuare vehementer animo caepimus, et varias in partes distrahi. Tum si quo modo recusare, ac defugere potuissemus gravissimam sarcinam, rationes omnes excogitavimus.

At immortales agantur gratiae *Deo totius consolationis, qui consolatur nos in omni tribulatione nostra.* Tranquillo iam, pacatoque animo sumus: quin et de imposito Nobis onere in Domino laetamur. Eo Nos consolante, in spem erigimur fore ut, quales vestri omnium mores sunt et modestiores, et ad praecepta capienda molliores, Pastoris vocī faciles vos aures praebeatis. Quod si oves non defuerint recto aberrantes tramite, divina potentia innixi, ac freti confidimus tanti negotii non futurum, ut nostris impositas humeris recta semita ad ovile recipiamus, ac Iesu Christo lucremur.

Hac igitur fiducia erecti, atque confirmati paternis aliquot hortamentis non ex ore tantum, sed ex intimo cordis sinu prodeuntibus vos modo praemonitos volumus.

Et vos primum alloquimur, Venerabiles Fratres, tum Brundusinae, cum Ostunensis Ecclesiae Canonici, qui principem obtinetis locum, atque in regiminis partem adsciti Nobis a consiliis adsidetis, et fulgentis instar coronae

nostro estis capiti. Vos pro ea, quae magnopere omnes commendat, doctrinae, morum probitatis, ac virtutum laude, ita Ecclesiae simul, et Pastoris utilitati servite, ut commodum utriusque, et decus respiciatis. Itaque, quantum caeteris honoris amplitudine, et gradus excellentia praestatis, tantum iis praelucete vitae, et sanctitatis splendore. Omni cura et diligentia perficite, ut ex Sacrorum Canonum, et Sacrosancti Concilii Tridentini praescriptis sarta tecta habeatur chori disciplina, divinarumque rerum maiestas perpetuo maneat inviolata.

Vos item auxiliariam Archiepiscopo adiungite manum in Ecclesiastica disciplina retinenda, atque amplificanda, vos, qui vicariam exercetis potestatem, et Pastoris personam sustinetis. Estote dispensatores mysteriorum Dei, et custodes, sanae doctrinae propugnatores, et vindices, ut rudes in ea instruere, atque exhortari valeatis, confirmare nutantes, contradicentes arguere, infirmos in fide corroborare, vosque ipsos eo ad tutelam scuto valide praemunire, *quo possitis omnia tela nequissimi ignea extinguere.*

At nihil non felix, faustumque ominamur a vobis, Pastores animarum, quorum de virtutibus fama nostras ad aures praeclara, fidelisque pervenit. Vos, qui in sollicitudinis nostrae partes vocati estis, vestra studia, curas, cogitationesque omnes Nobiscum simul coniungite. Tanquam pro Christo legatione fungentes in omnibus sanctitatis ipsius specimen vos praebete. Catholicae fidei praeceptis, et mysteriis imbuite commissos vestrae curae populos. Doctrinae Christianae scholas, earum frequentiam, studium progressionisque vehementer urgete. In omni patientia, et labore arguite, obsecrate, increpate. Pastoralem vocem ovis ne unquam subtrahite. *Sit sermo vester vivus, et*

efficax; non in persuasibilibus humanæ sapientiae verbis, sed in ostensione spiritus, et virtutis. Detecta vobis miserrorum hominum vulnera, uti misericors ille Samaritanus, oleo foveat, ac vino, non aceto, ut ita dicam, exasperate. Uno verbo, Nobiscum quaerite, quod periit, quod confectum est, alligate, quod pingue, et forte custodite.

Plurima quidem bona Nobis pollicemur, certoque speramus, ubi magna animi nostri cum voluptate Clerum novimus bene institutum. O Nos vere beatos! Enimvero Clerus eiusmodi ad omnes probitatis, pietatisque formam compositus Christi bonus odor efficiatur, necesse est. Agite itaque, Fratres nostri Sacerdotes, verbo, et exemplo, ut habeat populus proposita in vobis, quae capiat, documenta virtutis. Ita non solum Nobis, Ecclesiaeque adiumento, sed et *Deo acceptabiles eritis, bonorumque operum sectatores.*

Et vos, qui in utroque degitis Seminario, Ecclesiae addicti adolescentes, pietate, ac literis, qua fieri potest, maxima diligentia, animum excolite. Praesto est vobis bonarum artium, scientiarumque omnium Athenaeum, patet domicilium pietatis, modestiae, Religionis Christianae, atque Ecclesiasticae disciplinae schola. Omni ope vobis connitendum, ut inde idonei Ecclesiae Ministri prodeatis in eius cultum, ornamentum, et decus, atque in populi exemplum. Nos vicissim in pectore vos, et in oculis gerentes cogitationes, studia, curas, operamque omnem ad optimam vestram institutionem conferre in deliciis apprime habebimus; ac operi tam salutari, tantique emolumenti continenti, nec intermisso spiritu instabimus.

Vos etiam Regularium ordinum Sacerdotes, ad excolendam Christi vineam compellamus. Licet enim vestri sit

muneris, atque instituti, iugi orationis studio, divinarum rerum meditatione, ac vitae austeritate iratum Numen propitiatum reddere, non parum tamen ad Ecclesiae commodum vestram operam, vestrosque labores referre existimamus.

Nec vos silentio praeterire licet, sacrae Virgines, selecta gregis nostri portio, et quasi hortus conclusus fidei nostrae religiosissime concreditus. *Hortamur ergo vos, ne in vacuum gratiam Dei recipiatis*, sed ut eam, quam, terrenis rebus omnibus abdicatis, Christo dedistis, fidem integram praestetis: vestrique instituti leges accurate, sancteque impleatis. Sic munita erit vobis via ad fluxarum rerum contemptum, ad aeternarum studium, et spem, ad mutuae caritatis, et amoris sponsi Iesu incrementum.

Ad vos quoque nostra spectat oratio, quotquot estis in Gynaeceis mulieres, puellaeque Parentibus orbatae. Immunes iam gravibus corporis, animique, quibus unaquaeque vestrum patebat, incommodis, omnia vos subsidia, atque adiumenta ad honeste, recteque vivendum parata habetis. At Dei beneficiis, et bene de vobis merentium consiliis, votisque fideliter respondete. Christianae igitur Catechesi, Religionis officiis, ac muliebribus disciplinis sedulam operam navate. Moderatricibus dicto audientes estote: atque haec inter pro acceptis beneficiis gratias agere Deo, ipsumque pro omnibus bene de vobis merentibus rogare quotidianis precationibus ne unquam intermittatis.

Postremo universo vos hortamur, Filii in Christo Dilectissimi, ut *Dominum timeatis, eiusque praecepta servetis*: hoc est enim omnis homo. Itaque, o Nobis Carissimi, et Desideratissimi, cuiusvis estis Ordinis cives, quae vestri muneris partes, integre, nitideque a vobis serventur.

Festorum dierum, ac nuptiarum sanctitatem violari a vobis, Patres familias, filiis, famulisve vestris piaculum esto. Curate, ut quisque de familia Christianae Religionis praeceptis, et mysteriis domi, vel in scholis instratur: quemque ad divina festis diebus officia adeunda, sacramentaque frequentanda continenter urgete. *Audite, Fili, disciplinam Patris vestri, et ne dimittatis legem Matris vestrae, ut addatur gratia capiti vestro, et torques collo vestro.* Ab optima nimirum disciplina, ac liberorum institutione tota pendet Religio, et publica felicitas.

Verumtamen, quia *neque qui plantat, est aliquid, neque qui rigat, sed qui incrementum dat Deus*, enixis ab eo precibus flagitamus, ut det voci nostrae vocem virtutis, qua excitati Christifideles ad propositas sanctitatis regulas hilari lubentique animo aliquando conformentur.

Quapropter, Te quaesumus, *Pater misericordiarum, respice e caelo, et vide, et visita vineam istam, et perfice eam, quam plantavit dextera tua.*

A te, secundum Deum, singulare, ac praesentissimum fore Nobis praesidium speramus, planeque confidimus, Maria Sancta Dei Genitrix Virgo, cuius solemnia maximo veneratur cultu, ac religione, Metropolitana Ecclesia Brundusina, quo die Elisabethen Cognatam puerperii causa invisisti, Cathedralis vero Ostunensis, quo die fuisti sideribus recepta. Te praesertim opitulante, ac Patronis caelestibus, quorum in tutela utriusque Dioeceseos sunt cives, bene iuvantibus, certam, firmamque animo spem concipimus, Pastoralis nostrae administrationis auspicia bene, feliciterque ad exitum processura Nobis interea ex animo orantibus vestras, quaeso, venerabiles, et dilectissimi in Christo filii, enixas preces adiungite; de nostra enim non modo, verum et de vestra praesertim salute agitur.

Sed et deprecamini pro Beatissimo P. N. Gregorio XVI. ut Deus illum de Ecclesia universa, cuius est caput, petra, et fundamentum, optime meritum bonis omnibus augeat semper, et incolumem diutissime custodiat, et pro Augustissimo Rege nostro Ferdinando II. ut cum Augusta Coniuge sua Regina nostra, totaque Familia Regia diu vivat utriusque Siciliae Regni bono, ac felicitati, tandem et pro Eminentissimo, ac Reverendissimo *Domino Cardinali Iacobo Aloysio Brignole*, a quo Episcopalem accepimus consecrationem.

Pax fratribus, et charitas cum Fide a Deo Patre, et Domino Iesu Christo. *Benedictio Domini super vos; benediximus vobis in nomine Domini.*

*Datum Romae extra Portam Caelimontanam
ipsa nostrae Consecrationis die decima-
septima octobris MDCCCXLI.*

SDN 626910

IMPRIMATUR
F. D. Battani O. P. S. P. A. M.

IMPRIMATUR
I. M. Vespignani Archiep. Tian. Vicar.





Bl
via
S
PA